



Broj: 02/1-50-1-22-40/09  
Dana, 20.7.2009. godine

## ZAPISNIK

sa 40. sjednice Ustavnopravne komisije Doma naroda Parlamentarne skupštine BiH održane 15.7.2009. godine. Sjednica je održana 15.7.2009. godine sa početkom u 10 sati. Sjednici su prisustvovali članovi Komisije:

1. Ivo Miro Jović,
2. Slobodan Šaraba,
3. dr Hilmo Neimarlija,
4. Zoran Koprivica,

Sjednici je prisustvovao i sekretar Komisije, dr. Zijad Hasić.

Sjednici nije prisustvovao, iz opravdanih razloga, Sulejman Tihiić, drugi zamjenik predsjedavajućeg Ustavnopravne komisije.

Od gostiju, sjednici Komisije prisustvovali su: Bisić Mustafa, pomoćnik ministra Ministarstva pravde BiH; Milana Popadić iz Ministarstva pravde BiH; Mario Nenadić, pomoćnik ministra iz Ministarstva ljudskih prava i izbjeglica BiH; Fazila Musić, pomoćnik ministra za upravu iz Ministarstva pravde BiH; Nedim Hogić, pravni savjetnik u USAID-u/PSP; Dijana Andrić, službenica za odnose s javnošću pri Visokom sudskom i tužilačkom vijeću BiH (VSTV BiH); Dag Đumrukčić, savjetnik u Ministarstvu vanjskih poslova i Danijela Mikić, zamjenik predjednika VSTV BiH.

Prije uvrđivanja Dnevnog reda ove sjednice, vođena je diskusija o sjednici i termiu njegovog održavanja.

**Slobodan Šaraba** je ukazao na okolnost da bi racionalnije bilo da je sjednica održana dan ili dva dana ranije, jer su delegati bili aktivni u te dane u Parlamentarnoj skupštini BiH. U diskusiji je učešće uzeo i dr Hilmo Neimarlija.

**Ivo Miro Jović**, predsjedavajući Ustavnopravne komisije ukazao je na okolnost da je u navedene dane imao vema intenzivnu aktivnost (između ostalog imao je i radni ručak s kongresmenom iz USA, a postoje i obaveze prema klubovima). Oba dana prije sjednice bila su dosta dinamična, tako da bi održavanje sjednice u te dane bilo loše i iscrpljujuće rješenje.

Nakon toga, sekretar Komisije je predložio, a članovi Ustavnopravne komisije prihvatili, da se u Dnevni red uvrsti i tačka:

- Prijedlog zakona o izmjenama i dopunama Zakona o platama i naknadama u institucijama Bosne i Hercegovine, predlađač Vijeće ministara BiH, (**usaglašenost s Ustavom i pravnim sistemom: član 97. Poslovnika**);

Na prijedlog predsjedavajućeg Komisije **Ive Mire Jovića**, članovi Komisije su usvojili slijedeći

## DNEVNI RED

1. Verificiranje Zapisnika 39. sjednice Komisije;
2. Realiziranje ranije donesenih zaključaka;
3. Prijedlog zakona o izmjeni Zakona o ministarstvima i drugim tijelima uprave BiH; predlađač: Vijeće ministara Bosne i Hercegovine; (**osnovni zakonodavni postupak: Postupak u nadležnoj komisiji čl. 102.-107. Poslovnika**);
4. Prijedlog zakona o izmjenama Zakona o Državnoj himni Bosne i Hercegovine; predlađač Vijeće ministara Bosne i Hercegovine; (**usaglašenost s Ustavom i pravnim sistemom: Prva faza u nadležnoj komisiji: čl. 97. i 98. Poslovnika**);
5. Prijedlog zakona o izmjenama i dopunama Zakona o imunitetu Bosne i Hercegovine, predlađač Vijeće ministara BiH; (**usaglašenost s Ustavom i pravnim sistemom: Prva faza u nadležnoj komisiji: čl. 97. i 98. Poslovnika**);
6. Prijedlog zakona o protivminskom djelovanju u Bosni i Hercegovini, predlađač: Vijeće ministara Bosne i Hercegovine, (**usaglašenost s Ustavom i pravnim sistemom: član. 97. Poslovnika**);
7. Prijedlog zakona o izmjenama i dopunama Zakona o plaćama i naknadama u institucijama Bosne i Hercegovine, predlađač Vijeće ministara BiH, (**usaglašenost s Ustavom i pravnim sistemom: član 97. Poslovnika**);

8. Godišnji izvještaj Visokog sudskog i tužilačkog vijeća BiH za 2008. godinu (**razmatranje Izvještaja u skladu s članom 26. stav (2) Poslovnika**),
9. Informacija o stanju u vezi sa neblagovremenim upućivanjem pravosnažno osuđenih lica na izdržavanje kazni zatvora i mjera sigurnosti; podnosilac Informacije Ministarstvo pravde BiH, (**razmatranje Informacije u skladu s članom 26. stav (2) Poslovnika**);
10. Realizacija zaključka s 3. sjednice u vezi obrazovanja Fonda za pravilnu nadoknadu imovine;
11. Realizacija zaključka s 3. sjednice u vezi oslobađanja poreza zaposlenih građana BiH u međunarodnim institucijama;
12. Ostalo:
  - a. Informiranje o posjetama Švicarskoj Konfederaciji, Venecijanskoj komisiji i drugim posjetama;
  - b. Ostalo

#### **Ad. 1. Verificiranje Zapisnika 39. sjednice Komisije**

**Ivo Miro Jović**, predsjedavajući Komisije, predložio je diskusiju o ovoj tački Dnevnog reda.

Nije bilo diskusije o Zapisniku s 39. sjednice.

Nakon toga, Komisija je jednoglasno usvojila Zapisnik 39. sjednice.

#### **Ad. 2. Realiziranje ranije donesenih zaključaka**

U uvodu za ovu tačku dnevnog reda, **Ivo Miro Jović**, predsjedavajući Komisije, predložio je da, po običaju, sekretar Komisije, prezentira stanje zaključaka i njihove realizacije.

Sekretar Komisije, **dr Zijad Hasić**, upoznao je članove Komisije o stanju zaključaka, konstatirajući da je članovima Komisije dostavio pismeni pregled zaključaka i njihove dosadašnje realizacije.

U kraćem izlaganju, on je upoznao članove Ustavnopravne komisije o svakom zaključku posebno. Ukazao je na okolnost da će se na ovoj sjednici razmatrati problematika zaključaka 1. i 2. (Realizacija zaključka s 3. sjednice u vezi obrazovanja Fonda za pravilnu nadoknadu imovine i realizacija zaključka s 3. sjednice u vezi oslobađanja poreza zaposlenih građana BiH u međunarodnim institucijama), a zaključak 3. koji se odnosi na autentična tumačenja, kontinuirano se ostvaruje.

**Nakon kraće rasprave, članovi Ustavnopravne komisije Doma naroda Parlamentarne skupštine Bosne i Hercegovine, primili su na znanje prezentaciju zaključaka.**

**Ad. 3. Prijedlog zakona o izmjeni Zakona o ministarstvima i drugim tijelima uprave BiH; predlagač: Vijeće ministara Bosne i Hercegovine; (osnovni zakonodavni postupak: Postupak u nadležnoj komisiji čl. 102.-107. Poslovnika)**

U uvodu za ovu tačku dnevnog reda, **Ivo Miro Jović**, predsjedavajući Komisije, ukazao je na sljedeće:

Predlagač, Vijeće ministara Bosne i Hercegovine dostavio je, 5.5.2009. godine, Domu naroda Parlamentarne skupštine BiH Prijedlog zakona o izmjeni Zakona o ministarstvima i drugim organima uprave Bosne i Hercegovine, radi razmatranja i usvajanja po osnovnom zakonodavnom postupku. Ustavnopravna komisija Doma naroda Parlamentarne skupštine BiH, na 38. sjednici, održanoj 4.6.2009. godine, razmatrala je Prijedlog zakona o izmjeni Zakona o ministarstvima i drugim organima uprave Bosne i Hercegovine, predlagača Vijeća ministara Bosne i Hercegovine. Nakon provedene rasprave Ustavnopravna komisija Doma naroda Parlamentarne skupštine Bosne i Hercegovine, jednoglasno je utvrdila sljedeće:

1. Postoji ustavnopravni osnov za donošenje Zakona o izmjeni Zakona o ministarstvima i drugim organima uprave Bosne i Hercegovine;
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

Komisija je zatim, jednoglasno, podržala principe predloženog zakona. On je konstatirao da nije bilo uloženi amandmana.

Nakon toga, sekretar ustavnopravne komisije dr Zijad Hasić ukazao je na činjenicu da predlagač Zakona, pri izradi ovog Prijedloga zakona, nije uzeo u obzir ranije izmjene i dopune Zakona. Naime, u ranijim izmjenama i dopunama Zakona („Službeni glasnik BiH“, broj: 42/04), u članu 12. stav (1). iza alineje 4) dodate su nove alineje 5) i 6). Zato je predlagač Zakona načinio očitu grešku, jer se poziva na mijenjanje alineje 10. iz člana 12. stav (1), a radi se o promjeni alineje 12. iz navedenog člana. Predložio je da se prisutni predstavnik predlagača, Vijeća ministara BiH (iz Ministarstva za ljudska prava i izbjeglice BiH), očituje o tome.

Zaključeno je da se o ovoj tački razmatra nakon pažljive analize predstavnika Vijeća ministara BiH, ovog pitanja.

**Ad 4.** Prijedlog zakona o izmjenama Zakona o Državnoj himni Bosne i Hercegovine; predlagač Vijeće ministara Bosne i Hercegovine; **(usaglašenost s Ustavom i pravnim sistemom: Prva faza u nadležnoj komisiji: čl. 97. i 98. Poslovnika)**

U vezi ove tačke dnevnog reda, **Ivo Miro Jović**, predsjedavajući Komisije, ukazao je na slijedeće: Vijeće ministara Bosne i Hercegovine, kao predlagač, dostavio je 17.6.2009. godine, Domu naroda Parlamentarne skupštine BiH Predlog zakona o izmjeni Zakona o Državnoj himni Bosne i Hercegovine, radi razmatranja i usvajanja. Predložio je raspravu o Prijedlogu zakona.

U raspravi su učestvovali: Milana Popadić iz Ministarstva pravde BiH, Slobodan Šaraba dr Hilmo Neimarlija, Zoran Koprivica i predsjedavajući Ivo Miro Jović. Dr Hilmo Neimarlija je u svom dužem iskazu ukazao na brojnost prijedloga za izbor teksta Državne himne (bilo je 339 prijedloga tekstova) te postupak filtracije najkvalitetnijih tekstova.

Nakon provedene rasprave, Ustavnopravna komisija Doma naroda Parlamentarne skupštine Bosne i Hercegovine, jednoglasno je utvrdila slijedeće:

1. Postoji ustavnopravni osnov za donošenje Zakona o izmjeni Zakona o Državnoj himni Bosne i Hercegovine;
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

Komisija je zatim s tri glasa „za“ i jednim glasom „suzdržan“, podržala principe predloženog zakona.

**Ad 5.** Prijedlog zakona o izmjenama i dopunama Zakona o imunitetu Bosne i Hercegovine, predlagač Vijeće ministara BiH; **(usaglašenost s Ustavom i pravnim sistemom: Prva faza u nadležnoj komisiji: čl. 97. i 98. Poslovnika)**

U uvodu za ovu tačku dnevnog reda, **Ivo Miro Jović**, predsjedavajući Komisije, ukazao je na slijedeće:

Vijeće ministara Bosne i Hercegovine, kao predlagač, dostavio je 15.6.2009. godine, Domu naroda Parlamentarne skupštine BiH Prijedlog zakona o izmjenama i dopunama Zakona o imunitetu Bosne i Hercegovine, radi razmatranja i usvajanja.

Dužu elaboraciju o ovom prijedlogu zakona iznijela je **Milana Popadić** iz Ministarstva pravde BiH. Ona je govorila o aktivnosti posebno formirane interesorne radne grupe koja je i ovo napravila. Posebno je prikazan značaj rada sudskih organa.

U daljnjoj diskusiji posebno je govorio **Ivo Miro Jović**, kome su u uvum pitanju nejasne pozicije i uloga suda.

Nakon provedene rasprave, Ustavnopravna komisija Doma naroda Parlamentarne skupštine Bosne i Hercegovine, jednoglasno je utvrdila slijedeće:

1. Postoji ustavnopravni osnov za donošenje Zakona o izmjenama i dopunama Zakona o imunitetu Bosne i Hercegovine;
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

Komisija je zatim s tri glasa „za“ i jednim glasom „suzdržan“, podržala principe predloženog zakona.

**Ad 6.** Prijedlog zakona o protivmiskom djelovanju u Bosni i Hercegovini, predlagač: Vijeće ministara Bosne i Hercegovine, **(usaglašenost s Ustavom i pravnim sistemom: član. 97. Poslovnika)**

U uvodu za ovu tačku dnevnog reda, **Ivo Miro Jović**, predsjedavajući Komisije, ukazao je na slijedeće:

Vijeće ministara Bosne i Hercegovine, kao predlagač, dostavio je, 3.6.2009. godine, Domu naroda Parlamentarne skupštine BiH Prijedlog zakona o protivmiskom djelovanju u Bosni i Hercegovini, radi razmatranja i usvajanja u osnovnom zakonodavnom postupku. Nema predstavnika predlagača. Predložio je diskusiju.

Svi učesnici diskusije osudili su neozbiljan odnos predlagača Vijeća ministara BiH, da njihov predstavnik ne prisustvuje sjednici Ustavnopravne komisije. Ipak, mišljenja su da treba podržati ustavnopravni osnov i usaglašenost s Ustavom BiH i pravnim sistemom, jer od ovog Zakona zavisi korištenje određenih donatorskih sredstava.

Nakon provedene rasprave Ustavnopravna komisija Doma naroda Parlamentarne skupštine Bosne i Hercegovine je s tri glasa „za“ i jednim glasom „suzdržan“ utvrdila slijedeće:

1. Postoji ustavnopravni osnov za donošenje Zakona o protivmiskom djelovanju u Bosni i Hercegovini;
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

**Ad 7.** Prijedlog zakona o izmjenama i dopunama Zakona o platama i naknadama u institucijama Bosne i Hercegovine, predlagač Vijeće ministara BiH, **(usaglašenost s Ustavom i pravnim sustavom: članak 97. Poslovnika)**

U uvodu za ovu tačku dnevnog reda, **Ivo Miro Jović**, predsjedavajući Komisije, ukazao je na slijedeće:

Vijeće ministara Bosne i Hercegovine, kao predlagač, dostavio je, 19.6.2009. godine, Domu naroda Parlamentarne skupštine BiH Prijedlog zakona o izmjenama i dopunama Zakona o platama i naknadama u institucijama Bosne i Hercegovine. Nema predstavnika predlagača. Predložio je raspravu o ovom Prijedlogu zakona.

U raspravi, učesnici su ukazali na iznuđenost odlučivanja o ovom Zakonu, jer nisu poslali predstavnika, a znaju da se o ovom Prijedlogu zakona treba očitovati Ustavnopravna komisija. Predložio je slijedeći zaključak Ustavopravne komisije, koji treba uputiti Vijeću ministara BiH. Prije razmatranja problematike Prijedloga zakona, članovi Ustavopravne komisije usvojili su slijedeći zaključak:

*„Ustavnopravna komisija konstatuje sve slabiji odziv predstavnika predlagača Vijeća ministara Bosne i Hercegovine na njenim sjednicama. Takvo ponašanje predlagača pokazuje nemarnost i neozbiljnost prema zakonodavnom procesu, što za rezultat ima nekvalitetne rasprave o pojedinim prijedlozima zakona, iznuđena i površna mišljenja i izvještaje, kao i remećenje dinamike odvijanja zakonodavnog procesa pred Ustavnopravnom komisijom Doma naroda.*

*Ustavnopravna komisija podsjeća predlagača Vijeće ministara BiH da će ubuduće skidati sve tačke s dnevnog reda, ukoliko nema predstavnika predlagača, pa i u slučaju predlagača Vijeća ministara BiH, uz upozorenje da će za blagovremenost zakonodavnog procesa, kao i za eventualno nerazmatranje zakonskih prijedloga, predlagači snositi odgovornost.“*

Nakon toga, članovi ustavnopravne komisije proveli su raspravu o usklađenosti s Ustavom i pravnim sistemom ovog Prijedloga zakona.

Iza toga, Ustavnopravna komisija Doma naroda Parlamentarne skupštine Bosne i Hercegovine je s tri glasa „za“ i jednim glasom „suzdržan“ utvrdila slijedeće:

1. Postoji ustavnopravni osnov za donošenje Zakona o izmjenama i dopunama Zakona o platama i naknadama u institucijama Bosne i Hercegovine;
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

**Ad 8. Godišnji izvještaj Visokog sudskog i tužilačkog savjeta BiH za 2008. Godinu (razmatranje Izvještaja u skladu s članom 26. stav (2) Poslovnika),**

O ovoj tački dnevnog reda, **Ivo Miro Jović**, predsjedavajući ustavnopravne komisije istakao je slijedeće:

Visoko sudsko i tužilačko vijeće Bosne i Hercegovine dostavilo je, 14.5.2009. godine, Domu naroda Parlamentarne skupštine BiH Godišnji izvještaj Visokog sudskog i tužilačkog vijeća za 2008. godinu. Godišnji izvještaj Visokog sudskog i tužilačkog vijeća za 2008. godinu, je dostavljen na osnovu člana 20. st. (3) i (4) Zakona o Visokom sudskom i tužilačkom vijeću Bosne i Hercegovine („Službeni glasnik BiH“, br.: 25/04, 93/05, 48/07 i 15/08). Predložio je diskusiju. U diskusiji o ovom materijalu učestvovali su svi članovi Ustavopravne komisij, kao i zamjenica predjedavajućeg Visokog sudskog i tužilačkog vijeća, Danijela Mikić.

Nakon provedene rasprave Ustavnopravna komisija Doma naroda Parlamentarne skupštine Bosne i Hercegovine je s tri glasa „za“ i jednim glasom „suzdržan“ utvrdila slijedeće:

Ustavnopravna komisija prima na znanje Godišnji izvještaj visokog sudskog i tužilačkog vijeća Bosne i Hercegovine za 2008. godinu i predlaže Domu naroda da i on primi na znanje ovaj Godišnji izvještaj.

**Ad.9. Informacija o stanju u vezi sa neblagovremenim upućivanjem pravosnažno osuđenih lica na izdržavanje kazni zatvora i mjera sigurnosti; podnosilac Informacije Ministarstvo pravde BiH, (razmatranje Informacije u skladu s članom 26. stav (2) Poslovnika)**

U vezi ove tačke vođena je diskusija o procesnim pitanjima. Kao što je **Ivo Miro Jović** ukazao na početku diskusije, ovo je samo dogovor o razmatranju Informacije, jer je ovo pitanje vezano za aktivnost zajedničkih sjednica obje ustavnopravne komisije Parlamentarne skupštine BiH: kao su podaci dostavljeni prije nekoliko mjeseci, a neizvjesno je kada će se održati zajednička sjednica, ovo pitanje je stavljeno u fokus. Mustafa Bisić, pomoćnik ministra pravde htio je široko elaborirati ovo pitanje i objasniti Informaciju, ali je bio saglasan da se prava rasprava o Informaciji vodi na zajedničkoj sjednici obje ustavnopravne komisije.

Nakon toga, članovi Ustavopravne komisije predložili su predstavniku obrađivača, da na prvoj zajedničkoj sjednici prezentira i nove okolnosti i podatke o ovom predmetu.

Nakon završetka ove tačke, Ustavnopravna komisija je diskusiju vratila na tačku

**Ad. 3. Prijedlog zakona o izmjeni Zakona o ministarstvima i drugim tijelima uprave BiH; predlagač: Vijeće ministara Bosne i Hercegovine; (osnovni zakonodavni postupak: Postupak u nadležnoj komisiji čl. 102.-107. Poslovnika)**

Nakon duže pauze predstavnik predlagača Vijeća ministara BiH (Prijedlog zakona je pripremla Ministarstvo za ljudska prava i izbjeglice BiH) potvrdio je na sjednici Ustavnopravne komisije, kao i pismeno, aktom Ministarstva za ljudska prava i izbjeglice BiH, broj: 01-02-531-378 lj/09 DK od 15.7.2009. godine, da je u pitanju očita greška te predložio korekciju i pravno-tehničku ispravku, da se u članu 1. Prijedloga zakona o izmjeni Zakona o ministarstvima i drugim organima uprave Bosne i Hercegovine, umjesto pozivanja na član 12. stav (1) alineja 10) stavi alineja 12), što su članovi Ustavnopravne komisije prihvatili.

Nakon provedene rasprave, Ustavnopravna komisija Doma naroda Parlamentarne skupštine Bosne i Hercegovine, jednoglasno je utvrdila sljedeće:

1. Ustavnopravna komisija jednoglasno prihvata tekst Predloga zakona o izmjeni Zakona o ministarstvima i drugim organima uprave Bosne i Hercegovine, uz predlog, zasnovan na *članu 26. stav (1) alineja e) Poslovnika*, da Dom naroda konstatuje postojanje očite greške, da umjesto pozivanja na alineju 10. stoji alineja 12. te predlaže Domu naroda da usvoji takav Zakon s prijedlogom pravno-tehničke ispravke očite greške u tekstu;
2. U skladu s odredbom *člana 107. Poslovnika*, za izvjestioca pred Domom, Komisija imenuje Ivu Miru Jovića, predsjedavajućeg Komisije.

Ad 10. Realizacija zaključka s 3. sjednice u vezi obrazovanja Fonda za pravilnu nadoknadu imovine

U vezi ove tačke Dnevnog reda, **Mario Nenadić**, pomoćnik ministra u Ministarstvu za ljudska prava i izbjeglice, BiH istakao je sljedeće:

Ministarstvo za ljudska prava i izbjeglice BiH uradilo je Revidiranu strategiju iz ove oblasti. Ono je ušlo u polje pravilne nadoknade (pravične) za stradalnike rata, a mišljenja je da bi trebalo donijeti poseban zakon o pravičnoj nadoknadi.

U daljnjoj diskusiji su učestvovali **Zoran Koprivica** i **Ivo Miro Jović**.

**Na kraju, zatraženo je od predstavnika Ministarstva za ljudska prava i izbjeglice BiH Marija Nenadića da Ministarstvo nastavi s izradom posebnog zakona o pravičnoj nadoknadi.**

Ad 11. Realizacija zaključka s 3. sjednice u vezi oslobađanja poreza zaposlenih građana BiH u međunarodnim institucijama;

U vezi ove tačke, **Dag Đumrukčić**, iz Ministarstva vanjskih poslova BiH ukazao je na problem zaposlenih osoba u međunarodnim organizacijama. Dodao je da je još u februaru 2009. godine bio dogovor da Vijeće ministara BiH zauzme stav o ovom pitanju, a i da se Ministarstvo finansija i trezora BiH takođe očituje, što oni do danas nisu učinili.

Nakon diskusije dogoreno je da MIP BiH prati realizaciju ove aktivnosti, te nakon očitovanja Vijeća ministara BiH i Ministarstva finansija i trezora BiH, da nas obavijesti o tome radi daljnje procedure.

Ad. 12. Ostala pitanja

- a. Posjeta Venecijanskoj komisiji, Švicarskoj Konfederaciji i druge posjete;
- b. Ostalo

a) O posjeti Venecijanskoj komisiji govorio je sekretar Ustavnopravne komisije. Ukazao je na činjenicu da je poziv za posjetu, prosljeđena u Sektor za međunarodne odnose i protokol, koji je sačinio pismo, koje je službeno poslato. Čeka se reakcija Venecijanske komisije. Do dana održavanja sjednice Komisije nije stigao odgovor iz Venecijanske komisije.

O **posjeti Švicarskoj Konfederaciji** sekretar Ustavnopravne komisije dr Zijad Hasić ukazao je i na sljedeće podatke: Ustavnopravne komisije Parlamentarne skupštine Bosne i Hercegovine provode „Projekat pomoći Vlade Švicarske u procesu ustavnih promjena u Bosni i Hercegovini“, dogovoren prilikom susreta Njegove E. ambasadora Švicarske Konfederacije Rolf Lenza sa predsjedavajućim domova Parlamentarne skupštine BiH i predsjedavajućim ustavnopravnih komisija dana 05.3.2009. godine. U cilju provođenja projekta pomoći dogovoreno je s ambasadorom gosp. Lenzom, a što je i realizirano putovanje u Švajcarsku gdje je održan veći broj tematskih radionica i to: u Cirihu, Arau, Bernu i Ženevi na kojima su se uz interaktivno učešće sudionika, analizirali komparativni ustavnopravni sistemi složenih država Švicarske, Belgije, Španije, Njemačke, sistem neposredne demokratije i odnos između različitih nivoa vlasti u složenim državama. Ostvaren je i susret sa parlamentarcima na saveznom i kantonalnom nivou. Posjeta Švajcarskoj realizirana je u **periodu od 28.06. do 02.07. 2009. godine**, a delegaciju, sastavljenu od predstavnika obje ustavnopravne komisije činili su svi članovi obje komisije, oba sekretara, savjetnik odnosno saradnica obje komisije, te zaposleni u Zakonodavnom sektoru PS BiH.

Predsjedavajući ustavnopravne komisije **Ivo Miro Jović** govorio je i o “lažnim” informacijama o posjeti, koje su prenijela sredstva informisanja, te o međusobnim odnosima između njega i predsjedavajućeg ustavnopravne komisije Predstavničkog doma. Smatra potrebnim da na prvoj zajedničkoj sjednici obje komisije, postavi se ova tačka i riješe međuljudski odnosi.

U diskusiji su učestvovali i **Zoran Koprivica** i **Hilmo Neimarlija**.

Članovi Ustavnopravne komisije primili su na znanje ove podatke.

Dr Zijad Hasić, sekretar Ustavnopravne komisije predložio je da službe Parlamentarne skupštine BiH s francuskog jezika prevedu akte o nastanku i radu Ustavotvorne skupštine Ženevskog kantona koje je Povjerenstvo dobilo na poklon, što je jednoglasno i prihvaćeno.

Nakon toga, Komisija je završila svoju sjednicu u 13,40 sati.

SEKRETAR USTAVNOPRAVNE  
KOMISIJE  
dr. Zijad Hasić

PREDSJEDAVAJUĆI USTAVNOPRAVNE  
KOMISIJE  
Ivo Miro Jović